

■ PRO SVIZRA RUMANTSCHA

Stgaffir punts en la Rumantschia – anen ed ano

(anr/gc) La Pro Svizra Rumantscha (PSR) è vegnida fundada 1992 cun l'intent primar da realisar ina gasetta rumantscha dal di. Tras instituir l'Agentura da novitads rumantscha (anr) ed edir La Quotidiana è quella finamira stada cuntanschida. Dapi alur ha la PSR dà divers impuls speziels che han da far generalmain cun la promoziun dal rumantsch – concretamain tras scolaziun ed acziuns. Venderdi saira ha la PSR salvà sia 22avla radunanza annuala en la Staila a Cuira. Per l'emprima giada è ella vegnida presidiada da *Catarina Morscher*. Curt avant aveva il Telesguard preschentà la parsura, l'interrogond davart l'engaschi da la PSR – tar la quala i saja vegnì plitost quiet il davos temp.

In champ da stad cun success

Dal rapport presidial è sortì che la PSR vul stgaffir punts tant en la Rumantschia sco era anovers. L'acziun principala è perquai stada 2013 la realisaziun dal segund champ da vacanzas per uffants rumantschs da tuttas regiuns sisum la Surselva. Els èn ids in'emna a Sedrun a lavar aur e tschertgar cristallas. Pli che 30 uffants da la Surselva, Engiadina e da la Bassa han passentà bels dis enta Tujetsch ed èn vegnids accompagnads musicalmain da l'indigen *Pascal Gamboni*. Il champ saja stà in success.

L'onn passà ha la suprastanza da la PSR arranschà a Malans ina dieta per avair endament tge projects ed acziuns realisar il proxim temp.

Activitads per 2014

Era 2014 ha lieu a Sedrun in tal champ da vacanzas sco l'onn passà – e quai dals 20–25 da fanadur. Già sajan 16 annunzias entradas – tant ord terra rumantscha sco si da la Bassa. Ins quinta dentant anc cun dapli. In tal champ chaschuna ex-



Catarina Morscher ha timunà per l'emprima giada la radunanza da la PSR.

MAD

pensas da ca. 20 000 francs. A finanziar sa gidan era sponsurs cun ina summa considerabla.

Quest onn vegn la PSR a laschar endrizzar ina nova pagina d'internet e frestgantar ses logo. Davent dal proxim onn da scola è previs in barat da classas tranter las regiuns rumantschas.

Bunas finanzas

Las entradas da la PSR derivan dals ca. 300 commembers en l'importo da 8000 francs. Il quint serra cun in gudogn da 1100 francs tar entradas dad 8200 ed expensas da 7100 francs. Cun ina facultad da 50 000 francs dispona la PSR d'in bun fund finanziar.